

## **Schwitz** (nach Route 66)

Text: G. Wölflie Musik Bobby Troup

I fahr mit meim Rad aufd Schlatterhöh`  
Dr Drebbel an meim Rad isch scho lang lang nemme he  
krieg meine Kicks erscht dann wenn i schwitz.

Dr Radweg noch Lenninga isch voll wiead Sau  
ond am Wasserschlößle henter Dettinga gibts an Schtau  
krieg meine Kicks erscht dann wenn i schwitz.

Von Dettinga noch Owen,  
von Brucka noch Lenning  
älle fahrad rom grad wiea bei de Lemming

Bloß i fahr no dr Albtrauf nauf  
s isch ed normal wiea i do schnauf  
die Wada zucklar ons Rad des rucklat  
von dr Schtin tropft Brüh  
o was für a Müh

Doch i ben ned dr oinzig em Radlerdress  
auf dr Alb do wuslats isch Wochaend-Freizeit-Schdress  
krieg meine Kicks erscht dann wenn i schwitz.

Buckel nauf Buckel nonder  
was naufgoht goht au nonder  
ond Gutaburger Schtoig dui schaff i heit!  
Bloß de auga duats et guat wegam Pollaflug  
ond d'Nos isch verschtopft total verrotz  
doch i drebbel vor mi no, bis i nemme weiter ko  
ond i kehr au nirgends ei  
denn mir grillat hendadrei.

I fahr mit meim Rad aufd Schlatterhöh`  
Dr Drebbel an meim Rad isch scho lang lang nemme he  
krieg meine Kicks erscht dann wenn i schwitz.  
krieg meine Kicks erscht dann wenn i schwitz.  
krieg meine Kicks erscht dann wenn i schwitz.